



An Bhruiséil, 19 Meitheamh 2017
(OR. en)

10384/17

COTER 52
COPS 205
ENFOPOL 322
COSI 147

TORADH NA nIMEACHTAÍ

ó:	Ardrúnaíocht na Comhairle
An:	19 Meitheamh 2017
chuig:	na toscaireachtaí
Uimh. an doic. roimhe seo:	10383/17
Ábhar:	Conclúidí ón gComhairle maidir le gníomhaíocht sheachtrach an Aontais i dtaca leis an bhfrithsceimhlitheoireacht (19 Meitheamh 2017)

Gheobhaidh na toscaireachtaí san Iarscríbhinn a ghabhann leis seo na Conclúidí ón gComhairle maidir le le Gníomhaíocht Sheachtrach an Aontais i dtaca leis an bhFrithsceimhlitheoireacht, a ghlac an Chomhairle ag an 3551ú cruinniú dá cuid ar an 19 Meitheamh 2017.

Conclúidí ón gComhairle maidir le Gníomhaíocht Sheachtrach an Aontais i dtaca leis an bhFrithsceimhlitheoireacht

1. Cuireann an Chomhairle i dtreis go gcáineann sí go láidir gach uile chineál sceimhlitheoireachta, beag beann ar lucht a déanta ná an cuspóir atá léi. Is í an sceimhlitheoireacht ceann de na bagairtí is mó don tsíocháin agus don tslándáil idirnáisiúnta. Is olc leis an gComhairle na hionsaithe gránna sceimhlitheoireachta a rinneadh ar fud an domhain, tugann sí ómós do na híospartaigh agus déanann sí comhbhrón ó chroí le muintir agus le cairde na n-íospartach. Athdhearbhaíonn an Chomhairle nach féidir agus nár cheart an sceimhlitheoireacht a shamhlú le reiligiún, náisiúntacht, sibhialtacht ná grúpa eitneach ar bith. Cuireann ionsaithe sceimhlitheoireachta san Aontas agus in áiteanna eile níos faide ó bhaile i gcuimhne dúinn gur dúshlán mór é don Aontas agus dá shaoránaigh go fóill an sceimhlitheoireacht a chomhrac agus an radacú a chosc. Áirítear ar na bagairtí atá ann sceimhlitheoirí arb as an Aontas iad a oibríonn i líonraí; sceimhlitheoirí a ghníomhaíonn ina n-aonar; fillithe ar trodaithe sceimhlitheoireachta eachtracha, idir fhir, mhná agus mhionaoisigh iad; ionsaithe a ordaíonn nó a spreagann Da'esh agus Al Qaeda; dúshlán a bhaineann leis an gcibearshlándáil; agus idé-eolaíochtaí agus tuairimí a chuirtear chun cinn a mbíonn radacú agus antoisceachas foréigineach mar thoradh orthu.
2. Tá sé ar leas an Aontais leanúint den obair le comhpháirtithe déthaobhacha, réigiúnacha agus iltaobhacha chun aghaidh a thabhairt ar an mbagairt dhomhanda atá ag athrú go tapa agus ag éirí níos ilghnéithí an t-am uile agus tá sé réidh le dul i ngleic leis an mbagairt seo ar bhealach atá idir uaillmhianach agus réalaióch. Agus é ag comhoibriú le tíortha comhpháirtíochta agus eagraíochtaí idirnáisiúnta, déanfaidh an tAontas a chuid straitéisí a mheas agus a oiriúnú mar go bhfuil an bhagairt ag síor-athrú. Ní mór iarrachtaí seachtracha an Aontais a shaincheapadh agus a fhorbairt go hincriminteach nuair is iomchuí agus riachtanais agus cumas na gcomhpháirtithe á gcur san áireamh. Tá sé riachtanach go luíonn iarrachtaí déthaobhacha na mBallstát le hiarrachtaí a dhéanann comhpháirtithe idirnáisiúnta agus réigiúnacha.

3. Ag meabhrú gur ar na Ballstáit atá sé go príomha aghaidh a thabhairt ar an sceimhlitheoireacht, is féidir leis an Aontas tacú leis na hiarrachtaí a dhéantar ar go leor bealaí. Ba cheart an fhrithsceimhlitheoireacht (CT) a leabú i straitéisí agus polasaithe éagsúla an Aontais mar aon leis an gcuspóir go ndéanfaí an t-antioisceachas foréigneach a chomhrac agus a chosc. Tá sé i gcumas an Aontais an sceimhlitheoireacht agus an t-antioisceachas foréigneach a chomhrac ar bhealach comhtháite uathúil agus réimse leathan ionstraimí ar fáil dó in úsáid aige. Cuireann na hionstraimí seo ar chumas an Aontais aghaidh a thabhairt ar bhunchúiseanna leis an radacú agus tacú leis an bhforbairt shóisialta agus eacnamaíoch, smacht reachta, an dea-rialachas agus meas ar chearta an duine. Tá ról lárnach ag ionstraimí forbartha agus slándála i ndáil leis sin. Ba cheart cás speisialta na mban agus na gcailíní a chur san áireamh.
4. Is iad na conclúidí ón gComhairle Gnóthaí Eachtracha an 9 Feabhra 2015 bunchloch ghníomhaíocht sheachtrach an Aontais maidir leis an bhfrithsceimhlitheoireacht go fóill. Cruthaíodh fiúntas na n-ionstraimí a ceapadh mar thoradh ar na conclúidí sin agus ba cheart na hionstraimí sin a threisiú agus a oiriúnú chun aghaidh a thabhairt ar threochtaí agus ar dhúshláin nua. Bíonn saoránaigh an Aontais ag dúil le gníomhaíocht fhreagrach dhiongbháilte. Is tosaíocht i Straitéis Dhomhanda an Aontais iad iarrachtaí an Aontais maidir leis an sceimhlitheoireacht a chomhrac agus meabhraíonn sé go mbraitheann an tslándáil sa bhaile ar an tsíocháin agus ar sheasmhacht na dteorannacha agus cuireann sé i dtreis gur gá go mbeadh gníomhaíocht sheachtrach an Aontais i gcomhréir le beartas inmheánach an Aontais, go luífeadh sé leis agus go gcuirfeadh sé leis.

Struchtúir frithsceimhlitheoireachta

5. Is díol sásaimh don Chomhairle gur daingníodh agus gur bunaíodh cumas sonrach de chuid an Aontais chun comhoibriú maidir leis an bhfrithsceimhlitheoireacht a fheabhsú – go háirithe Lárionad Frithsceimhlitheoireachta na hEorpa ag Europol, an Roinn Frithsceimhlitheoireachta den tSeirbhís Eorpach Gníomhaíochta Seachtraí (EEAS) agus an líonra de shaineolaithe frithsceimhlitheoireachta/slándála a ceapadh i 13 thoscaireacht de chuid an Aontais. Cuireann na struchtúir seo le gníomhaíochtaí leanúnacha frithsceimhlitheoireachta na mBallstát, an Choimisiún Eorpaigh, Chomhordaitheoir frithsceimhlitheoireachta an Aontais agus gníomhaireachtaí de chuid an Aontais atá gníomhach i réimse an Cheartais agus Gnóthaí Baile. Cuireann an Chomhairle in iúl an athuair an ról atá ag INTCEN an Aontais mar mhol chun measúnú straitéiseach faisnéise a dhéanamh ar leibhéal an Aontais, lena n-áirítear i ndáil leis an bhfrithsceimhlitheoireacht.

6. I gcomhréir leis an ionchas atá ag saoránaigh an Aontais go gcuirfidh an tAontas leis na hiarrachtaí a dhéantar chun aghaidh a thabhairt ar shíorbhagairt na sceimhlitheoireachta, iarrann an Chomhairle go ndéanfar cumas an Aontais a threisiú tuilleadh chun inbhuanaitheacht fhadtéarmach agus leanúnachas gnó a áirithiú. Ag cur measúnú ar an taithí a fuarthas go dtí seo san áireamh, iarrann an Chomhairle go ndéanfar raon geografach agus raon feidhme, nuair is iomchuí, an líonra saineolaithe frithsceimhlitheoireachta/slándála a leathnú chun Corn na hAfraice, An Áise Láir agus an Áise Thoir Theas a chuimsiú. Ba cheart go ndéanfar treisiú ar a ról i misin na mBallstát i dtaca le comhordú áitiúil, tacaíocht agus beartais a fhorbairt.

Nasc inmheánach/seachtrach

7. Is díol sásaimh don Chomhairle an obair leanúnach ar naisc idir an tslándáil inmheánach agus an tslándáil sheachtrach a fheabhsú, ar chur chun feidhme na Straitéise Domhanda agus ar aontas slándála éifeachtach dílis a bhunú. Tá sé seo i gcomhréir leis an straitéis athnuaite slándála inmheánaí don Aontas agus leis an treochlár maidir le treisiú a dhéanamh ar naisc idir an Comhbheartas Slándála agus Cosanta, an tsaoirse, an tslándáil agus an ceartas. Is díol sásaimh don Chomhairle freisin an Clár Oibre Eorpach maidir leis an tslándáil agus an imirce agus an teachtaireacht i dtaca leis an aontas slándála.

8. Ina theannta sin, leis na sainorduithe athbhreithnithe atá ag Europol agus ag an nGníomhaireacht Eorpach um an nGarda Teorann go háirithe, beidh na gníomhaireachtaí sin in ann rannchuidiú leis an troid i gcoinne na sceimhlitheoireachta ar bhealach níos éifeachtúla agus comhleanúnachas níos fearr a áirithiú idir ghníomhaíochtaí inmheánacha agus seachtracha i réimse na slándála. Cuireann an Chomhairle i dtreis gur cheadaigh sí, ina conclúidí i mí na Bealtaine 2017, misin Feira a shíneadh ionas go gcuirfí an troid i gcoinne na sceimhlitheoireachta leo agus leis an síneadh sin gur cheart go méadófaí an nasc idir an tslándáil inmheánach agus an tslándáil sheachtrach. Dá bhrí sin, meabhraíonn an Chomhairle di an ról atá ag misin agus oibríochtaí sibhialtacha agus míleata CBSC sa troid i gcoinne na sceimhlitheoireachta trí fheabhas a chur ar an tslándáil, ar an gcobhsaíocht, ar an rialú teorann agus ar an athchóiriú ar earnáil na slándála, i bhforbairt na hacmhainneachta frithsceimhlitheoireachta agus i roinnt na faisnéise. Iarrann sí go mbeidh comhar níos fearr ann agus go sainaithneofar na sineirgí idir gníomhaíochtaí CBSC agus CGB. Gan dochar don fhreagracht atá ag gach Ballstát faoi leith as an tslándáil náisiúnta, is díol sásaimh don Chomhairle na hiarrachtaí leanúnacha atá á ndéanamh chun neart a chur le gníomhaíocht an Aontais maidir leis an bhfrithsceimhlitheoireacht trí fheabhas a chur ar fhorfheidhmiú an dlí agus ar an gcomhar míleata, laistigh d'ord atá bunaithe ar rialacha, lena n-áirítear faisnéis a mhalartú i measc gníomhaithe ábhartha náisiúnta, atá ina bpríomhchuid den fhreagra smachta reatha. Leagann an Chomhairle béim ar a thábhachtaí atá sé tacú le Interpol, trí fhaisnéis iomchuí a chomhroinnt nuair is iomchuí agus nuair is féidir ó thaobh an dlí de, agus forbairt a dhéanamh ar uirlisí chun faisnéis a chomhroinnt amhail córais réamhfhaisnéise faoi phaisinéirí agus córais uathoibríocha maidir le sainaithint méarlorg.

Neartaítear an comhar sa Mheánoirthear agus san Afraic Thuaidh, sna Balcáin Thiar, sa Tuirc, sa tSaiheil agus i gCorn na hAfraice

9. Is díol sásaimh don Chomhairle gur leathnaíodh agus gur neartaíodh comhar frithsceimhlitheoireachta an Aontais tríd an idirphlé polaitiúil tiomnaithe maidir leis an bhfrithsceimhlitheoireacht le tíortha comhpháirtíochta tosaíochta sa Mheánoirthear agus san Afraic Thuaidh. Ba cheart na hiarrachtaí sin a choinneáil ar bun agus a fhorbairt tuilleadh mar ábhar tosaíochta d'fhonn comhpháirtíochtaí éifeachtacha frithsceimhlitheoireachta a fhorbairt leis na tíortha tosaíochta sin agus uirlisí slándála inmheánacha á n-úsáid ar bhealach spriocdhírithe. Ba cheart leanúint leis an gcomhar leis na Balcáin Thiar agus leis an Tuirc i gcomhréir leis na conclúidí ón gComhairle Gnóthaí Ginearálta i mí na Nollag 2015.

10. Meabhraíonn an Chomhairle di a thábhachtaí atá sé aghaidh a thabhairt ar an bhfrithsceimhlitheoireacht i gclársceidealú ábhartha ionstraimí an chomhair sheachtraigh. Is díol sásaimh don Chomhairle na tionscadail réigiúnacha frithsceimhlitheoireachta a cuireadh i bhfeidhm agus iarrann sí go gcuirfear chun feidhme ina n-iomláine iad. Iarrann an Chomhairle ar na Ballstáit leas a bhaint as saineolas chun cláir frithsceimhlitheoireachta an Aontais a chur chun feidhme agus iarrann sí ar an gCoimisiún an oiread úsáide agus is féidir a bhaint as na féidearthachtaí uile atá ann cheana d'fhonn tionscadail frithsceimhlitheoireachta a chur chun feidhme go tapa agus ar bhealach comhordaithe. Ba cheart slógadh thionscadail na nIonstraimí um Chúnamh Teicniúil agus um Malartú Faisnéise agus slógadh tionscadail nasctha a mhéadú. Is díol sásaimh don Chomhairle an méadú suntasach a tháinig ar an tacaíocht airgeadais le haghaidh na frithsceimhlitheoireachta agus le haghaidh an t-antioisceachas foréigeanach a chosc agus a chomhrac, arbh ionann é agus EUR 225 milliún faoi dheireadh 2016.
11. I gcomhréir lena conclúidí maidir leis an ngné sheachtrach de shlándáil inmheánach an Aontais a neartú sna Balcáin Thiar, athdhearbhaíonn an Chomhairle a thábhachtaí atá sé go neartófaí comhpháirtíocht oibríochtúil an Aontais le tíortha réigiún na mBalcán Thiar maidir leis an bhfrithsceimhlitheoireacht, agus i ndáil leis an antioisceachas foréigeanach a chosc agus a chomhrac, trí Thionscnamh Frithsceimhlitheoireachta na mBalcán Thiar agus tríd an Rialachas Slándála Inmheánaí Lánpháirtithe, lena n-áirítear an comhrac in aghaidh na coireachta eagraithe trasnáisiúnta agus an tslándáil teorann. Cuireann an Chomhairle béim freisin ar an tábhacht a bhaineann le hiarrachtaí comhpháirteacha éifeachtacha atá á ndéanamh maidir leis an troid i gcoinne na gáinneála aindleathaí ar airm agus i gcoinne ghluaiseachtaí na dtrodaithe eachtracha agus an troid i gcoinne na dtionchar idé-eolaíoch antioisceach sna Balcáin Thiar chomh maith.
12. Leagann an Chomhairle béim ar a thábhachtaí atá rannpháirtíocht fheabhsaithe i gcúrsaí frithsceimhlitheoireachta, lena n-áirítear tríd na fóraim agus na meicníochtaí ábhartha réigiúnacha, leis an tSaiheil agus le Corn na hAfraice, i ndáil lena gcumas a fhorbairt agus saineolas a roinnt leo maidir leis an bhfrithsceimhlitheoireacht, agus i ndáil leis an antioisceachas foréigeanach a chosc agus a chomhrac, agus aghaidh a thabhairt ar an mbagairt don tslándáil réigiúnach. Meabhraíonn an Chomhairle di an tacaíocht a thugtar do thionscnaimh, cumas agus oibríochtaí Afracacha, chun troid i gcoinne na sceimhlitheoireachta agus chun an t-antioisceachas foréigeanach a chosc agus a chomhrac, trí ionstraimí éagsúla an Aontais (an tSaoráid Síochána don Afraic, CBSC, an Ionstraim lena gcuirtear le Cobhsaíocht agus le Síocháin, Ciste Iontaobhais Éigeandála an Aontais Eorpaigh don Afraic) agus athdhearbhaíonn sí an tábhacht a bhaineann le tionscnaimh amhail Comhfhórsa G5 Saiheile, an Tascfhórsa Comhpháirteach Ilnáisiúnta nó Misean an Aontais Afracaigh sa tSomáil, a bhfuil d'aidhm acu freagairtí réigiúnacha comhordaithe agus leithreasú áitiúil a chothú. Leagann an Chomhairle béim ar a thábhachtaí atá sé don Aontas feabhas a chur ar a chumas chun cur le hacmhainneachtaí slándála agus cosanta san Afraic agus i gcás inarb iomchuí an fhrithsceimhlitheoireacht a chur san áireamh i misin agus in oibríochtaí CBSC.

13. Is díol sásaimh don Chomhairle an obair leanúnach atá á déanamh ag an Ardionadaí agus ag an gCoimisiún chun dlús a chur leis an gcumarsáid straitéiseach agus iarrann sí orthu leanúint leis an obair chun ionstraimí an Aontais a neartú d'fhonn aghaidh a thabhairt ar dhúshláin na cumarsáide ar bhealach níos éifeachtaí. I ndáil leis an méid sin, is díol sásaimh di an treisiú nua lena neartófar acmhainneacht an Tascfhórsa Theas maidir leis an gCumarsáid Straitéiseach, a bunaíodh in 2015 agus é mar chuspóir aige feabhas a chur ar an gcumarsáid agus ar an bhfor-rochtain i gcomharsanacht an deiscirt, lena n-áirítear san Araibis, agus insintí dearfacha ar an Aontas agus ar a bheartais a fhorbairt agus a chur chun cinn. Sa phróiseas seo, is féidir linn leas a bhaint as saineolas an Líonra Eorpaigh um Chumarsáid Straitéiseach.
14. Is ábhar inní é don Chomhairle radacú na ndaoine óga leochaileacha, agus iarrann sí ar an Ardionadaí agus ar an gCoimisiún díriú níos géire ar an oideachas, ar an idirphlé idirchultúrtha, ar neartú na sochaí sibhialta neamhspleáiche rithábhachtaí agus ar na cláir i gcomhair an Aontais agus i gcomhair an Mheánoirthir agus na hAfraice Thuaidh lena gcruthaítear poist agus lena gcuirtear malartuithe óige ar fáil go réigiúnach: ba cheart an clár fíoriúil Erasmus a d'fhógair an Coimisiún in 2016 agus a nascann an t-aos óg Eorpach agus t-aos óg Arabach, ba cheart é a sheoladh chomh tapa agus ar bhealach chomh huaillmhianach agus is féidir. Ina theannta sin, maidir leis na malartuithe idir scoileanna san Aontas, i dtíortha an Mheánoirthir agus na hAfraice Thuaidh, sa Tuirc agus sna Balcáin Thiar, ba cheart tuilleadh forbartha a dhéanamh orthu agus ba cheart scoláireachtaí do dhaoine óga ón domhan Arabach a mhéadú freisin.

Neartaítear an comhar idirnáisiúnta

15. Is díol sásaimh don Chomhairle na iarrachtaí atá a ndéanamh ag an Aontas chun an fhor-rochtain, an comhar agus an comhordú i ndáil leis an bhfrithsceimhlitheoireacht a neartú le príomh-comhpháirtithe straitéiseacha amhail SAM, an Astráil, Ceanada agus comhpháirtithe Schengen. Tá rithábhacht fós leis an gcomhar le comhlachtaí réigiúnacha agus iltaobhacha, lena n-áirítear na Náisiúin Aontaithe, ESCE, Comhairle na hEorpa, ECAT, Interpol, an tAontas Afracach, an Chomhghuaillíocht Dhomhanda i gcoinne Da'esh, an Fóram Frithsceimhlitheoireachta Domhanda (GCTF) agus a mheitheal maidir le Corn na hAfraice, an Tascfhórsa um Ghníomhaíocht Airgeadais, Comhphobal Eacnamaíoch Stáit na hAfraice Thiar, G7, G5 Saiheile, Comhlachas Náisiúin na hÁise Thoir Theas, Léig na nArabach agus Comhairle Comhair Stáit Arabacha na Murascaille. Tugann an Chomhairle dá haire a thábhachtaí atá an rannpháirtíocht le gníomhaithe ábhartha eile lena n-áirítear Stáit na Murascaille, Iosrael agus, mar aon leis sin, i gcomhréir leis na treoirphrionsabail atá againn, an Rúis. Leagann an Chomhairle béim freisin ar a thábhachtaí atá sé leanúint leis an bhfor-rochtain, leis an idirphlé agus leis an gcomhar leis an Afganastáin, le Lár na hÁise agus leis an Áise Thoir Theas, leis an tSín, leis an India, leis an Indinéis, leis an Iaráin, leis an Nigéir, agus leis an bPacastáin.

16. Is díol sásaimh don Chomhairle na hiarrachtaí athchóirithe atá á ndéanamh ag na Náisiúin Aontaithe agus ag an Ardrúnaí faoi láthair chun oifig frithsceimhlitheoireachta a bhunú. Athdhearbhaíonn an Chomhairle gur lena leas é go mbeidh na Náisiúin Aontaithe láidir agus éifeachtúil agus go gcuirfidh siad dlús leis an gclár oibre frithsceimhlitheoireachta tábhachtach domhanda, agus cur chuige cothrom acu ar fud na gceithre cholún de Straitéis Frithsceimhlitheoireachta Dhomhanda na Náisiúin Aontaithe, agus go dtacaíonn sí leis na Náisiúin Aontaithe mar sin freisin. Molann an Chomhairle go leanfar leis an gcomhar praiticiúil agus leis an gcomhordú idir an tAontas agus na Náisiúin Aontaithe i réimsí leasa fhrithpháirtigh ar leibhéal na ceanncheathrún agus ar an leibhéal allamuigh araon, trí dhlúthchomhar le comhlachtaí na Náisiúin Aontaithe atá páirteach sa fhrithsceimhlitheoireacht, lena n-áirítear an oifig frithsceimhlitheoireachta a bunaíodh le déanaí agus Coiste Frithsceimhlitheoireachta Stiúrtóireacht Feidhmiúcháin na Náisiúin Aontaithe (UNCTED), trí úsáid a bhaint *inter alia* as na measúnuithe ar riachtanais acmhainneachta a dhéanann UNCTED le rialtais tríú tíortha ábhartha mar bhunús le haghaidh cúnamh ón Aontas. Cuireann an Chomhairle i dtreis go bhfuil tacaíocht iomlán á tabhairt aici don phlean gníomhaíochta ó Ard-Rúnaí na Náisiúin Aontaithe i ndáil leis an antoisceachas foréigeanach a chosc.
17. Is díol sásaimh don Chomhairle na hiarrachtaí atá á ndéanamh ag GCTF chun aghaidh a thabhairt ar an mbagairt i ndáil leis an antoisceachas foréigeanach, bagairt atá ag athrú de shíor, agus chun cur chun feidhme a chuíchóiriú agus díriú air freisin agus chun comhoibriú go dlúth leis na Náisiúin Aontaithe. Leanfaidh an tAontas le tacaíocht chuimsitheach a thabhairt do réimsí oibre éagsúla GCTF, lena n-áirítear institiúidí ar spreagadh le GCTF iad — an Institiúid Idirnáisiúnta don Cheartas agus don Smacht Reachta i Málta; *Hiodaia*, an tIonad Barr Feabhais Idirnáisiúnta chun an t-Antoisceachas Foréigneach a Chomhrac atá lonnaithe in Abu Dhabi; agus an Ciste Domhanda don Rannpháirtíú agus don Athléimneacht sa Ghinéiv. Bainfidh an tAontas úsáid as a ról comhchathaoirleachta sa Mheitheal maidir le Forbairt Acmhainneachta i gCorn na hAfraice mar chabhair chun aghaidh a thabhairt ar riachtanais acmhainneachta spriocdhírithe, trí fheabhas a chur ar an gcomhordú, ar úsáid na n-acmhainní agus chun machnamh a dhéanamh ar an mbealach a bhféadfaí tionscnaimh réigiúnacha a neartú.
18. Meabhraíonn an Chomhairle di an deis le haghaidh comhar Aontais le ECAT i réimsí ábhartha, mar a léiríodh sna Conclúidí ón gComhairle i mí na Nollag 2016 maidir leis an tsraith chomhchoiteann de thograí le haghaidh chur chun feidhme an chomhdhearbhaithe a shínigh an tUachtarán Tusk, an tUachtarán Juncker agus Ardrúnaí ECAT Stoltenberg i Vársá ar an 8 Iúil 2016. Is díol sásaimh don Chomhairle an cinneadh ó ECAT rannchuidiú an chomhaontais a fheabhsú chun an sceimhlitheoireacht dhomhanda a chomhrac trína tacaíocht leis an gcomhghuaillíocht dhomhanda i gcoinne Da'esh.

19. Is díol sásaimh don Chomhairle na hiarrachtaí atá ar bun ag an gcomhghuaillíocht dhomhanda i gcoinne Da'esh. Beidh tacaíocht an Aontais rithábachtach chun struchtúir pholaitiúla dhlisteanacha agus chuimsitheacha a choinneáil cobhsaí san Iaráic agus sa tSiria sa tréimhse a thiocfaidh i ndiaidh Da'esh agus go fadtéarmach. Tá an Chomhairle sásta dlús a chur leis an bhfothú acmhainní agus leis an obair maidir le hathchóiriú na hearnála slándála san Iaráic, lena n-áirítear trí shineirgí leis an gclár reatha maidir le comhordú agus comhroinnt faisnéise i measc seirbhísí forfheidhmithe dlí agus seirbhísí faisnéise na hIaráice agus le tionscadail eile atá dírithe ar chumas frithsceimhlitheoireachta agus forfheidhmithe dlí na hIaráice a fhorbairt, i gcomhréir le measúnú na Náisiún Aontaithe ar riachtanais i leith na frithsceimhlitheoireachta don Iaráic. Beidh sé rithábachtach freisin dlús a chur leis an obair chun áiteanna nua tearmainn a shéanadh ar Da'esh agus ar eagraíochtaí sceimhlitheoireachta eile. Tá an chumarsáid straitéiseach chomh tábhachtach céanna agus ba cheart aon chomhlántachtaí a d'fhéadfadh a bheith idir thionscadail reatha de chuid Chill Chumarsáide na Comhghuaillíochta Domhanda agus tionscadail an Aontais sa Iordáin, sa Liobáin nó sa Túinéis, mar shampla, ba cheart iad sin a fhorbairt.

Freagairt an Aontais i bpríomhréimsí téamacha a neartú

20. Iarrann an Chomhairle rannpháirtíocht mhéadaithe maidir le cosc agus comhrac an antoisceachais fhoréignigh (C/CAF), lena n-áirítear ar an leibhéal domhanda. Cuireann an Chomhairle i dtreis go bhfuil tacaíocht iomlán á tabhairt aici don phlean gníomhaíochta ó Ard-Rúnaí na Náisiún Aontaithe chun an t-antoisceachas foréigneach a chosc agus d'fhorbairt pleananna gníomhaíochta náisiúnta agus réigiúnacha i ndáil leis an antoisceachas foréigneach a chosc. Maidir le straitéisí agus beartais frithsceimhlitheoireachta agus straitéisí agus beartais i ndáil leis an antoisceachas foréigneach a chosc agus a chomhrac, tugann an Chomhairle dá haire go bhfuil a gcinn bunaithe nó athbhreithnithe ag go leor tíortha le déanaí nó go bhfuil an méid sin idir lámha anois acu. Iarrann sí go ndéanfar cosc agus comhrac an antoisceachais fhoréignigh (C/CAF) a phríomhshruthú go córasach san idirphlé polaitiúil agus i gclár chúnaimh. Ní mór gach leas a bhaint as treoirlínte nuashonraithe ECFE lena gcinntear go bhfuil cistí agus clár C/CAF i dteideal cúnamh oifigiúil um fhorbairt (ODA). Ba cheart béim ar leith a leagan ar ról na mban, na ndaoine óga, na sochaí sibhialta, íospartaigh na sceimhlitheoireachta agus na gceannairí reiligiúnacha agus comhphobail mar ghníomhairí don athrú sa tsochaí. Cuireann an Chomhairle i dtreis a thábhachtaí atá sé an ghníomhaíocht uile a bhaineann le C/CAF a chomhordú go héifeachtach, lena n-áirítear taighde agus anailís a chomhroinnt, comh-stocaireacht agus comh-rannpháirtíocht, agus idirghabhálacha, clár agus tionscadail chomhpháirteacha a fhorbairt chun tacú le pleananna gníomhaíochta C/CAF. Is díol sásaimh don Chomhairle go bhfuil an Líonra um Fheasacht ar an Radacú á neartú trí ionad barr feabhais a bhunú agus tríd an rannpháirtíocht seachtrach le tíortha tosaíochta, maille leis an machnamh atá á dhéanamh i gcónaí i dtaca le cumas an Aontais sa réimse seo a neartú a thuilleadh.

21. Tugann an Chomhairle dá haire na dúshláin a thagann leis an ábhar sceimhlitheoireachta agus antoisceach ar líne, ar dúshlán é atá ag dul i méid, agus cuireann sí i dtreis gur gá dul i ngleic, ar bhealach éifeachtach, leis an earcú agus radacú ar líne. Spreagann an Chomhairle soláthraithe seirbhísi cumarsáide, cuideachtaí sna meáin shóisialta, craoltóirí agus comhlachtaí tionscail eile chun cur, de réir a chéile, lena n-iarreachtaí dul i ngleic leis na ceisteanna seo ar luas agus ar scála níos mó, de réir a dtéarmaí seirbhíse. Is díol sásaimh don Chomhairle na hiarrachtaí atá á ndéanamh ag lucht tionscail go leanúnach i dtaca le teicneolaíocht agus uirlisí nua a fhorbairt agus a roinnt ar mhaithe lena gcóras reatha uathbhraite a fheabhsú agus i dtaca le hábhar neamhdhleathach a bhaint, maille le tacú le hinsintí dearfacha éagsúla, i gcomhréir le Rún 2354 ó Chomhairle Slándála na Náisiún Aontaithe, agus tacú le feachtais chumarsáide. Is díol sásaimh don Chomhairle na hiarrachtaí atá á ndéanamh ag Fóram Idirlín an Aontais Eorpaigh chun na Ballstáit agus lucht tionscail a thabhairt le chéile chun dul i ngleic leis an gceist phráinneach seo agus tacaíonn sí leis na hiarrachtaí sin. Aithníonn an Chomhairle ról na meán i dtaobh tacú le plé éagsúil lena gcuirfí i gcoinne ábhar antoisceach ar líne agus an fuathchaint a chomhrac, oideachas maidir le smaointeoireacht chriticiúil agus litearthacht sna meáin a chur chun cinn mar ghnéithe tábhachtacha lena gcuirfear i gcoinne an radacaithe agus an antoisceachais fhoiréignigh.
22. Is díol sásaimh don Chomhairle an gníomhaíocht a rinneadh chun tabhairt faoi dhúshlán na dtrodaithe eachtracha sceimhlitheoireachta, go háirithe ceist an lucht fillte, lena n-áirítear mná agus leanaí, trí thionscadail frithsceimhlitheoireachta a chur ar bun leis na tíortha comhpháirtíochta sin is mó atá thíos leis an gceist seo. Tá roinnt na faisnéise ina gné rithábhachtach fós de na hiarrachtaí dul i ngleic le trodaithe eachtracha sceimhlitheoireachta a fhilleann agus den ghníomhaíocht frithsceimhlitheoireachta i gcoitinne. Glacadh céimeanna suntasacha chun dul i ngleic leis seo laistigh den Aontas agus tá comhoibriú leanúnach le tíortha comhpháirtíochta de dhíth chun deimhniú go roinnfear faisnéis faoi na bagairtí sceimhlitheoireachta is tromchúisí leo siúd a bhfuil gá acu léi, agus go ndéantar sin ar bhealach a chomhlíonann an dlí. Leagann an Chomhairle béim ar a thábhachtaí atá sé taithí a chomhroinnt chun an dlí a chur ar throdaithe eachtracha sceimhlitheoireachta, an radacú i bpríosúin a chomhrac agus chun cabhrú leis an lánpháirtiú sa tsochaí. Tugann an Chomhairle dá haire a thábhachtaí atá sé tacú le himscrúduithe agus le hionchúisimh thrasteorann, go háirithe i gcás trodaithe sceimhlitheoireachta eachtracha agus daoine aonair atá faoi amhras maidir le cionta sceimhlitheoireachta a phleanáil nó a dhéanamh. Spreagann an Chomhairle tuilleadh rannpháirtíochta sa réimse seo, lena n-áirítear trí chomhar i bhforfheidhmiú an dlí idir Europol agus tíortha tosaíochta, de réir mar is iomchuí, agus tugann sí dá haire ról Eurojust i dtaobh cuidiú le Ballstáit in imscrúduithe agus in ionchúisimh leis na tíortha sin. Iarrann an Chomhairle freisin go mbeidh ann do chomhar níos dlúithe le Interpol, chun idirphlé agus comhar a chothú ar phríomhshaincheisteanna slándála, lena n-áirítear an sceimhlitheoireacht, an choireacht eagraithe thrasnáisiúnta agus an chibearchoireacht.

23. Leagann an Chomhairle béim ar an ngá atá le leanúint de thús áite a thabhairt d'iarrachtaí maoiniú na sceimhlitheoireachta agus sciúradh airgid a chomhrac. Áirítear leis sin beartais agus rialacháin a chur chun feidhme a mbeidh sé mar aidhm leo mí-úsáid na gcóras airgid chun na críche sin a luaitear thuas a chosc, an comhar dlíthiúil agus an fhreagairt dhlíthiúil a atreisiú, an comhar idir údaráis inniúla a chur chun cinn, sócmhainní sceimhlitheoirí a reo, smachtbhannaí a ghlacadh agus a chur chun feidhme agus na huirlisí a thabhairt do lucht forfheidhmithe dlí chun gníomhaíocht neamhdhleathach airgeadais a rianú. Chuige sin, athdhearbhaíonn an Chomhairle go dtacaíonn sí le fóraim idirnáisiúnta, lena n-áirítear Tascfhórsa um Gníomhaíocht Airgeadais (FATF), G20 agus meitheal na comhghuaillíochta domhanda i gcoinne Da'esh maidir le maoiniú na sceimhlitheoireachta. Iarrann sí tuilleadh tacaíochta do thríú tíortha ina gcomhrac i gcoinne mhaoiniú na sceimhlitheoireachta agus sciúradh airgid, mar a leagtar amach i bPlean Gníomhaíochta an Choimisiúin. Áirítear leis an méid sin gníomhaíocht chun roinnt na faisnéise a fheabhsú, mar aon le soláthar an chúnamh theicniúil do thríú tíortha d'fhonn feabhas a chur lena gcumas cloí le Rúin ó Chomhairle Slándála na Náisiún Aontaithe agus moltaí FATF i dtaca le sciúradh airgid/maoiniú na sceimhlitheoireachta a chomhrac. Tá an tAontas ag tacú le hiarrachtaí tríú tíortha gach foinse airgid a d'fhéadfadh a bheith ag grúpaí sceimhlitheoireachta, amhail gáinneáil aindleathach, a aithint agus tabhairt fúthu. Chuige sin, ba cheart díriú ach go háirithe ar an gcomhrac i gcoinne na gáinneála ar earraí cultúrtha, rud a chomhlíonfadh ag an am céanna an fhreagracht idirnáisiúnta i dtaca le hoidhreacht chultúrtha an chine dhaonna a chosaint. I ndail leis sin, is díol sásaimh don Chomhairle gur osclaíodh Coinbhinsiún Chomhairle na hEorpa um Chionta a bhaineann le Maoin Chultúrtha le deanaí lena shíniú.

24. Leagann an Chomhairle béim ar an tábhacht atá le cur chuige an cheartais choiriúil i dtaca leis an gcomhrac i gcoinne na sceimhlitheoireachta agus le tacaíocht a thabhairt do thíortha comhpháirtíochta a gcumas sa cheartas coiriúil, a neartú i gcomhréir leis an dlí idirnáisiúnta, lena n-áirítear an dlí idirnáisiúnta um chearta an duine, an dlí idirnáisiúnta um dhéanaithe agus an dlí daonnúil idirnáisiúnta agus imscrúdú na gcásanna a bhaineann leis an bhfrithsceimhlitheoireacht a fheabhsú ó thaobh an smacht reachta de. Ba cheart leanúint de na hiarrachtaí an dlí a chur ar Da'esh agus ar eagraíochtaí eile sceimhlitheoireachta, i ndlúthchomhar leis an Iaráic agus le tríú tíortha agus eagraíochtaí idirnáisiúnta eile. Ba cheart an fhrithsceimhlitheoireacht a phríomhshruthú níos mó agus níos mó i gclár cheartais. Spreagann an Chomhairle comhpháirtithe sa Mheánoirthear agus san Afraic Thuaidh chun iad féin a ailíniú leis agus a aontú ar deireadh do na Coinbhinsiúin sin de chuid Chomhairle na hEorpa atá oscailte do neamh-chomhaltaí. Iarrtar ar an gCoimisiún agus ar SEGS féachaint ar bhealaí leis an gcomhar breithiúnach in ábhair choiriúla a fhorbairt le tíortha tosaíochta agus, go háirithe, féachaint ar a indéanta agus a úsáidí a bheadh sé comhaontuithe nua a chaibidil leo ar leibhéal an Aontais i ndáil le cúnamh dlíthiúil frithpháirteach. Sa chomhthéacs sin, leagann an Chomhairle béim freisin ar ábharthacht Rún 2322 ó Chomhairle Slándála na Náisiún Aontaithe lena ndírítear ar an gcomhar breithiúnach agus póilíneachta idirnáisiúnta i gcoinne na sceimhlitheoireachta a neartú, ós rud é go n-ardaíonn sé feachtas ar an ngá atá leis an gcomhar sna réimsí sin agus ar an ngá atá le huirlisí a chruthú chun sin a chur chun cinn. Leagann an Chomhairle béim freisin ar a thábhachtaí atá sé cearta íospartaigh na gcoireanna sceimhlitheoireachta a chosaint agus beartais a chruthú chuige sin.
25. Tugann an Chomhairle dá haire an measúnú ar bhagairt na coireachta tromchúisí eagraithe a rinne Europol in 2017 agus an measúnú ann ar na naisc atá idir an sceimhlitheoireacht agus coireacht eagraithe thromchúiseach agus thrasnáisiúnta. Chuige sin, iarrann sí go leanfar de mheasúnú a dheanamh ar na naisc sin agus go ndéanfar gníomhaíocht dhíríthe d'fhonn díriú ar na dronganna coiriúla eagraithe sin a éascaíonn gáinneáil ar dhaoine, ar airm, ar dhrugaí agus ar earraí i dtíortha tosaíochta sa Mheánoirthear, san Afraic Thuaidh, sna Balcáin Thiar agus sa Tuirc, lena n-áirítear, más iomchuí, trí na tíortha sin a bheith níos rannpháirtí i dTimthriall Beartais an Aontais. Is díol sásaimh ach go háirithe don Aontas an Plean Gníomhaíochta Comhpháirteach idir an tAontas agus na Balcáin Thiar maidir le gáinneáil aindleathach arm tine agus tugann sí dá haire an t-athbhreithniú atá beartaithe ar Straitéis 2005 an Aontais chun carnadh agus gáinneáil aindleathach ar mhionarmáin agus ar armáin éadroma mar aon le lón lámhaigh a chomhrac.

26. Is díol sásaimh don Chomhairle Rún 2309 ó Chomhairle Slándála na Náisiún Aontaithe "Threats to international peace and security caused by terrorist acts (Bagairtí don tsíocháin agus don tslándáil idirnáisiúnta ó ghníomhaíochtaí sceimhlitheoireachta): Aviation security" (Slándáil eitlíochta) (Meán Fómhair 2016) agus go bhfuil an tAontas dírithe arís ar thacú le tíortha comhpháirtíochta chun feabhas a chur ar a gcuid nósanna imeachta slándála eitlíochta i gcomhréir le caighdeáin idirnáisiúnta, go háirithe i réigiún an Mheánoirthir agus na hAfraice Thuaidh. Leagann an Chomhairle béim ar an tábhacht atá le bearta éifeachtacha agus comhréireacha chun aghaidh a thabhairt ar bhagairt na sceimhlitheoireachta don eitlíocht, bagairt atá ag síorathrú, agus spreagann sí na Ballstáit, an Coimisiún agus SEGS agus na rioscaí sin á meas acu a thuilleadh le chéile. Leagann an Chomhairle béim ar a thábhachtaí atá sé oibriú as lámha a chéile ar an leibhéal domhanda chun bagairt na sceimhlitheoireachta a chomhrac, lena n-áirítear san earnáil mhuirí idirnáisiúnta. Is díol sásaimh freisin don Chomhairle Rún 2341 ó Chomhairle Slándála na Náisiún Aontaithe a glacadh d'aon toil i mí Feabhra 2017 maidir le cosaint na bpríomhbhonneagair ó bhaol na n-ionsaithe sceimhlitheoireachta.
-